

هبة حسن

على سبيل الوجد

أشعار بالعامية المصرية

طبعة أولى ٢٠١٩

## بطاقة الكتاب

-----

عنوان المؤلف : على سبيل الوجد  
المؤلف : هبة حسن  
التصنيف : أشعار بالعامية المصرية  
رقم الإيداع : ٢٠١٩/٢٧٨٠٧  
الترقيم الدولي : ٢-٣٥-٦٧٧١-٩٧٧-٩٧٨  
عدد الصفحات : صفحة  
رقم الإصدار الداخلي : ٥٦٠  
تاريخ الإصدار الداخلي : ٢٠١٩ ، طبعة أولى  
تصميم الغلاف والتنسيق : الشاعرة منى الغريب

جميع حقوق الطبع والنشر محفوظة للشاعر، ولا يحق لأى دار  
نشر طبع ونشر وتوزيع الكتاب إلا بموافقة كتابية وموثقة من  
الشاعر

-----

**مؤسسة النيل والفرات للطبع والنشر والتوزيع**

ثورة مصرية تشرق إبداعاً على الوطن العربي

رئيس مجلس الإدارة  
**ناجى عبد المنعم**

**النيل والفرات**  
شع والنشر والتوزيع  
أسسها الشاعر ناجى عبد المنعم  
حزق 2007

رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 01-35-572  
عضو عامل باتحاد الناشرين المصريين رقم 941 لسنة 2018  
هاتف: 01011256943 - 01116202218 - 01202541192 - 0120554372901  
النيل والفرات | [nagyegy200064@gmail.com](mailto:nagyegy200064@gmail.com)  
[alnilwaaifourat@gmail.com](mailto:alnilwaaifourat@gmail.com)  
الناشر والمسئول: د. هبة حسن - المحاورين: رمضان - مجازة 13 - أمام سنتر الد - 304

## إهداء

إلى / أمي الحبيبة

إلى / زوجي الحبيب

الذي وقف بجانبني وشجعني ، ولولاه ماأبدعت

وما عرفت حروفي طريقها للنور

إلى أولادي / كريم وسعاد وضحي

إلى / أخواتي الغاليين علي قلبي

هبة حسن

عضو رابطة الزجالين وكتاب الأغاني  
عضو نادي أدب القلب

## كل ذنبي

كل ذنبي اني هويته  
كنت راحته .. كنت بيته  
كنت بامسح له الهموم  
كنت عايشه كل يوم  
ان حلمي كان معاه  
كنت دايمًا بادعي ليه  
كنت أقرب حد ليه  
كان تملى يقولي انتي  
أحلى حلم باعيش عليه  
كان واهمني بإن حبه  
شي هيفضل كل يوم  
كان تملى فى حضن قلبي  
يبتسم ويقول ياريت  
تبقى فعلا يوم حقيقة  
تترسم بين الجفون  
بين ضلوعى بيشكى همه  
كنت بالنسبة له امه  
كنت اطبب كنت احايل



كنت شايقة وانا جنبه  
ان كل الكون جميل  
فجأة ضاعت كل حاجة  
والتقيتني بين سراب  
كان بيخدع ... وبيبراعة  
كان بيوصفلي القناعة  
حُبه واصل للسحاب  
كنت عايشة في وهم حبه  
كنت عايشة ما بين كلام  
سابني تايهة بين حروفه  
ولسه طايرة م الغرام

.....



## نقش الدمعة

يا دمعه نقشها ف ايدي  
وجوه جراحي بتزيدي  
وكحل عيونها من دمي  
ولا تسمي .. على دبح الفرخ فيا  
ما انا المشتاقه حنييه  
لقيت التوهه في عينيه  
تغني ف جرح تعذيبي  
وطالع يبكي من كفي  
بيقتل حلمي بيصفي  
عشان الغدر متخفي  
فلا تغيبني  
يا دمعة حزن ضميني  
وزيدى الجرح ف سنيني  
يا طعم الفرحة سامحيني  
ده وجعي قدرى ونصيبي  
ولا تعيبني  
دموع ف عيوني ما تكفي  
جراح الحزن ف كفي

يا راسم بالوجع ضعفي  
انا ملّيت..من القلب اللي دابحني  
ويحلف عمره ما جرحني  
يا حزن المر سامحني  
انا اتهديت .. من الصرخه اللي ف الأحزان  
من الدمعه اللي ف الوجدان  
ويادعي كل يوم يا زمان  
يا ريتني نسيت  
جراح في القلب نرسمها  
بضلمة ذل نقسمها  
وبالأحزان نكملها  
ما انا اللي جنيت ..على نفسي وشرياني  
على القلب اللي بيعاني  
يا جاني الالهه ما كفايه  
جراح بتهد ف كياني ..انا ملّيت  
خسارة بجد من روحي  
علي دمعة قصيد بوحي  
يا دنيا زيدي ف جروحي  
ما انا اتهديت

## أمي الغالية

أول بس ما بادخل بيتنا  
قلبي ببسأل نفسي سؤال  
أمي الغالية فين طلته  
فين ضحكتها في كل مكان  
فين الغصن الطارح ورد  
فين الحلم اللي بيتمد  
فين الجدر العازف حب  
أسمع منها : أنا موجودة  
تقول لي تعالي يابت يا توته  
أجري عليها و اطوف حوالها  
وانسى همومي مع الأحزان  
يضحك قلبي وتدمع عيني  
لما بتدعي براحة البال  
بنتي الغالية وفرحة عمري  
انتي هناكي أهم أمان  
قلبي يرفرف جوه ضلوعي  
لما بترضى عليا ف يوم

أمي اللي بتمحيلي هموم  
تغسل كل الحزن بكلمة  
تمحي ألامي بأجمل دعوه  
ربي احفظها من الأحزان  
أمي أنا عايشة بكل دعاكي  
مهما هااوفي .. مش هيكفي  
أمي يانهر بيغسل جرحي  
بكل مشاعري وكل جوارحي  
بادعي لربي يطول عمرك  
ياللي الجنة بتنده إسمك  
ياللي فداكي كل حياتي  
بانسى معاكى كل آهاتى  
أمى بترسم بسمة جميلة  
فوق الشفة وفوق الخد  
أمى الدعوة الصادقة بجد  
أمى الحب اللى مالوش حد

.....

## إلى روعي

إلى القلب اللي كان نبضه.. بيحيي الروح..  
إلى البسمة اللي بتنسي عذاب وجروح..  
إلى الإيد اللي بتطبطب على جبينك  
إلى الروح اللي عاشقاها.. وفاكراها منين ما بروح  
ودعوة قلب من صدقه ريحتها تفوح..  
ومسكة إيد و بتطبطب على قلبي خلاص بتروح  
كده تفارق ضلوع قلبي  
تسحب روعي ببعدك .. وهونت عليك تودعني  
دموع عيني بتحرقني  
بلاها سكوت ..  
ورجّع قلب كان بيموت في بعدك  
هاخاصم كل شي فياً  
وترجعلي على ميعادك  
وعدت انك ماتتخلي  
ولو فكرت ببعدك ..هاعيش العمر أنا محتار  
ف ليه تبعد وتنساني  
تسيب قلبي في وسط النار

.....

## خيط العنكبوت

يا خيط العنكبوت عشش  
واشكي للوجع همّي  
أنا ملّيت سنين عدت عذاب وحنين  
دموع ساكنة ف نن العين  
و فيه ع الحيطّة صورة كمان  
لأب وكان لي نبع حنان  
وجنبه أمي بضحكتها بتملام الفرحة ألوان  
وع الطبلية نتجمع بفرحتنا وأحلامنا  
ونحكي والقلوب تسمع ونتمنى...  
هنا أنا هابقي دكتورة  
واخويا هيدرس الكورة  
وامي بفرحة تتباهى  
ولادي حبايبي .. وبضمة  
تدمّع عينها بالفرحة  
وتدعي لنا مانتفرق  
وابويا بحبه يجمعنا ويسمعنا .. يمتعنا  
بقصة جميلة ورواية ويطلب منا معنى  
لكل حكاية يحكيها ونتسابق على الأول

فهمت القصة واحكيها  
لكن طبعه ده كان غيرنا  
عاوزنا نتعظ بيها  
وخوفهم لما باتاخر  
أنا واخواتي وقلقهم علينا بلهفة المحروم  
وفرحتهم بكراستي ونجمايا بتضحكي  
في قلب السطر ويتحكي  
وزغروطة نجاحي في يوم بهدايا واغلي هدوم  
ونرفرتي مع اخواتي على شوكة ، على فوطة  
على رسماية ع الحيطه  
وماتش الكورة ومسلسل ... نشد ريموتنا يتكسر  
وبصة أبويا تفزعنا  
ونحضن بعض بالمعنى كان مفيش مابينا خناق  
يلف وضهره بقى لينا نشد شعورنا بايدينا  
وما أحلى خناق اخوات بشوق ومحبة نتلاقي  
ونضحك ضحكنا العالي  
حيطان بيتنا بتتشقق وتصرخ صرخة مكتومة  
ولو رسمت ٢٠٠ ضحكة بتبقى الضحكة مظلومة  
حيطان بيتنا بتنده لي ويتقولي كفاية هموم

دموعك لو في يوم ممكن ترجعهم  
هكون زيك كمان مهموم  
خلاص فارقت هنا اللمة  
خلاص ولا يوم هنتجمع  
خلاص نسيو خلاص اسيو  
خلاص الفرحة مش راجعة  
خلاص راحوا ومش فاضل  
سواك يملا حيطان البيت  
ياخيظ العنكبوت  
عشش على قلوبنا ...  
خلاص مليت  
.....

## أعذروني

لقيتني دايبة ف نار هواه  
وياحلم اني أعيش معاه  
بانسى روعي جنب منه  
يمحي أي دموع وآه  
كل كلمة يقولها ليا  
ساكنة روعي ساكنة فيا  
لو حكيت عن نار هواه  
تبقى جنة في الحياة  
لو رسمت الصبح نور  
يبقي متحنّي بضياه  
قلبي رفرق يوم ماقالها  
حب واصل منتهاه  
اعذروني عشان ب اتوه  
لو لمحت طيفه مرة  
بانسى كل الدنيا ديا  
لو هيهمس ١٠٠ بحبك  
قلبي هيقول ألف مرة

.....

## حالة الحزن

وحالة الحزن جوايا  
بتتشعب لأبعد حد  
بتفرش كل يوم مطرح  
وتأخذ مني كام صورة  
ومحصورة ما بين بركان  
كل ستايره مقهورة  
وجدران الألم ألوان  
بتكتب كل يوم رحلة  
واقضيها مع التوهان  
وبتحسّر على الأيام  
وباستنى معاه بكرة  
ف يطلع بكرة كام فكرة  
وكام منظر بدون عنوان  
وعاش الحزن جوايا  
بيطرح من دموعه دموع  
يقاسي الجرح ف حكاية  
ويطفي من حياته شموع  
وليه يا بحر مرسايا

حطام مركب مالهوش قلع  
وياحضن روعي في الضلمه  
الآقي في عمري كام كلمه  
ونسمة بتقتل النسمة  
تقولي الفرح بات ممنوع  
والملم من حطامي حطام  
وحلم يموت مع الأيام  
سلام يا معذباني سلام  
خلاص مش باقي غير جرحي  
ودمعة غدر في ملامحي  
ده عمري لو لمح فرحي  
يموت.. يبكي بصوت مسموع  
....

## وجالك قلب

وجالك قلب يا قاسي  
تكون ناسي لكلام قولناه  
لوعد وعدته يوم ليا  
تنسيني الألم والآه  
لحلم وعشته بين حضنك وباتمناه  
قدرت تكون كما الصخرة على قلبي  
وتشرخ شرخ في ضلوعي  
وهونت عليك... وهانت عيني ودموعي  
وايه تاني هاتعمل.. قول؟  
خلاص طفت كده شموعي  
ياجمل حب خلاني بادوب وياه  
و قولّي ازاي ... صبحت الآهه جوايا  
وليه ترميني وسط النار بدون أعذار  
وانا فاكراك حتصبح بكره ويايا  
يابسمة جففت دمعي  
وشالت من حياتي هموم  
ياوردة وطارحة جوايا ... بلاش اللوم  
ياسارق من عيوني النوم

حتى سييلي ضحكاي  
وحبة نبض بهويا بلون قلبك  
عشان ابكي على قلبي  
واتوب بالحب عن ذنبي  
بإني ف يوم كده عشقتك .. وصدقتك  
وفجأه القاك بعيد عني .. وتظلمني  
و روجي تقول كده كفايه  
ألملم حلمي متكسّر ومتحسّر  
و على وجعي انا هاصبر  
ولا ح انساك ولا هاقدر  
أداري دمعته بتصور فلاش باهت  
علي صورتي  
وانا في قصيدة بتسطر  
وريدي سطر ف حكاية  
يا طعم المر يا مسكر  
حكاية روحها بتصور  
حكاية قلب كان عاشق  
ولسه في حلمه بيسابق  
عيون زرقا لموج فارق

شطوط للدمعه بتكبر  
خلاص يا قلبي مكتوبك  
تعيش بالدمع من توبك  
نصيب حبك كده راضي  
تعيش في الحلم ع الفاضي  
يا شكوى تهز ف القاضي  
خلاص تعبت بدا نهايه  
ولا عارفه اروح على فين  
ولا قادرة أداري حنين  
واخرتها هالاقى سنين  
تقولي خلاص كده كفايه  
يا طعم الحب يا مسافر  
وناسي ترمي حتي سلام  
وطعم العشق لو كافر  
هاتوب التوبه في الأحلام  
يا خوفي يا قلبي ل تعافر  
ويطلع كل ده اوهام  
مسير الحزن ليه آخر  
وتطرح فرحتي أنغام

## فراقك على عيني

أنا اللي الحزن ماليني  
دموع ساكنه ف تكويني  
فراقك كان على عيني  
وباحلم لو تنادينني  
تأخذ أيامي وسنيني  
جراحي وألمي وأنيني  
طريق مفروش وتفاصيله  
بناره القايدہ تكويني  
أنا المحتاج لأحضانك  
بالفّ وادور في مدارك  
وتشغلني عيوني بخوف  
بالاقي السهد مشوارك  
وباسرح كل ليله ويوم  
أناجي طيفك العالى  
رؤى الجنه ف حضن عنيك  
وطيبه قلبك الغالى  
جمال روحك بيحلالى

.....

## مين فينا

مين فينا جوه قلبه مانجرحش

أو في جروحه ألف نقش

زي السواقي العطشانين

بيبات حزين

مين فينا حزنه كل يوم بس اللي عايش

والحلم من كتر الهموم بالدمع فارش

موجوعه من المة النجوم

حتي الجراح ما تكفي دينه وكسرتة

ولا حتي قلب الاشتياق

مش لاقى سكة فرحته.. يا غربته

والبخت متحني بعذابه

والقهر ليه فاتح كتابه

كان حلمه يرجع له شبابه

ويلاقي قلب بصدمته

وقت الهوي ساب ضحكته

تقلع في محصول الوجع

كان الأمل بشرة طريق

دلوقتي ضاع حتي الصديق

والصبر فينا مات غريق  
ما بقيتش فارقه في دمعته  
مين السبب مين اللي خان  
والجرح عايش للزمان  
يتوضأ من دمع المكان  
لكنه عمره ما بل ريق  
وسط الطريق غنوة ألم  
مولودة من أصل العدم  
يا قلبي مين اللي اتظلم  
والنعي من حرف الحريق  
وبتنعي ليه .. عمرك حياتك  
مكبوته روحك جوه ذاتك  
والصبر قاضي بس عارف  
إن اللي خانك يوم مماتك  
يضحك بجرحك بس خايف  
ان القمر يعشق ساعاتك

.....

## جَرَّب

لو عاوز تبعد طب جرب  
وريني ازاي راح تتغرب  
عن قلبي .. وعن عقلي الراسي  
ماقدرش اشيلك من راسي  
رسماك أنا نجمه ف كراسي  
فبلاش تخسر قلبي العطشان لحنان منك  
وبلاش النبض الدايب فيك بتفتت فيه  
ده السم ف حبك جربته وأنا صابره عليه  
ماتجرب حاول وريني  
أزاي أنا راسمه ف تكويني  
تفاصيل نبضك وف شرايني ينبض اسمك  
وازاي تبعد طب وريني  
أنا نبض وساكن ف ضلوعك  
أنا ليل عطشان قوي لخضوعك  
وأنا عارفه أن أنا مالكة كيانك  
ساكنك بجنانك وحنانك  
دي السما بتمطر ألوانك  
أبيض يشبه لجمال قلبك

## ومين بعدك

ومين بعدك .. يطمنى

ويمسح دمعى .. منى

وجوه ف حضنه .. يحمينى

بحنانه يدفينى

يطببط لما احتاجله

يداوى جراحى وأنينى

ولما أغلظ يعلمنى

ومن نظرة يفهمنى

خلاص بسمتى دبلت

وتاهت منى أحلامي

كنت بيت عمره

ما اتقفلت بيبانه

كنت فجر عمره مايبطل

اذانه

كنت غيظ من نخيله

تشتهى يطرح أوانه

كنت جنبك لا انحنى

ولا اكون ذليلة

كنت حضى ف قلب ليلة

عومة وحزينة

كنت بسمة ف ليل حزين

كنت دوا للمجروحين

سيبتنى وبعدت ليه

ده البعاد ماقدر عليه

.....

## آه م الرجالة

آه .. م الرجالة وعمائلهم.. ودى حاجة جنان  
قربت خلاص اطفش منه .. واعمل زوجان  
عاوز يرجع يلقانى ملكة .. كده زى زمان  
جرب وحياتى تعيش ليلة .. وسط التوهان  
ماتبص ف لحظة لمراية.. ولا حتى تبان  
اغسل وانضف واروق ..  
والسوق وخضار عمالة ادوق  
ومذاكرة ف جدول ضرب اليوم  
عربى على حساب .. ولا طامر فيه  
اهرب م المطبخ للصالة .. وهدوم بالكوم  
يرمى لى الحاجة ف ميت مطرح .. ولا حتى ألوم  
وان قلت ان انا مش شغالة  
يزعق ويقول طالع عينى وف شغلى ياناس  
مش عارف حتى انى ارضيكى  
وعقلى انا محتاس  
تعبان .. شقيان .. زهقان .. طقهان  
حسى شوية .. نفسى فى روقان  
وان قلت له ذاكر لولادك يصرخ ويقول

انا بادفع مبلغ كل شهر وده مش معقول  
عاوزانى اذاكر واركز واعيد واقول  
ورينى شطارتك ورينى  
ده الفقر معاكي مخليني  
علي طول خارج .. دايمًا بره  
ما هو جوه البيت .. ولا فيه مسره  
قاعده يوماتي .. اه يا ست الأم  
سايبه عيالك .. ومتابعه الفيلم  
لو جيت خارج .. نفسي في مره  
ألقي جنابك .. عقلك جره  
مرة حماتي .. عايزه تشوفك  
وانا وعيالك مش في ظروفك  
قال إيه نفسها قال تنهوى  
وتزور أهلها بره وجوه  
وانا ازعل م ازعل ايه يعني  
مش فاضية تصالح ولا مرة  
حظ الرجاله وده نصيبها  
تشرب من ظلم بنات حوا  
.....

## اختلاف الأمنيات

انت يمكن تبقى غيرهم  
فى اختلاف الأمنيات  
حد قلبه بجد صافى  
روح بتعشق أغنيات  
تشبه الغصن اللى فتح  
لما كل الزرع مات  
تشبه الشجرة العفیه  
والجدور آخر ثبات  
حد نظرة حلوة منه  
تمحى كل سنين آهات  
إيد تططب ع الجروح  
روح تنسينى اللى فات  
والجمال فى القلب وردة  
ترسمك ضلة وآية  
والنجوم بالضيّ شاهدة  
والحنين راسم حكاية  
باعشقتك بقصيدة شاردة  
طير يرفرف فوق سمايا

كل حاجه فيا مني  
تعشقتك وده غصب عنى  
آه بحبك رغم انى  
نقش صورتك بين دمايا  
ياللا نزرع من حنانك  
ورد شايفك نور زمانك  
يالى من حبك أوانك  
يبتدي أجمل بدايه  
قول باحبك قولها تانى  
ألف طير بعينيك نادانى  
ضم روحى من زمانى  
حاضن البدر ف مسايا  
لم حضنى جوه حضنك  
نفسى اعيش العمر جنبك  
بيت صغير جوه قلبك  
تبقي وحدك روح هوايا  
.....

## كلنا مرضى

كلنا مرضى ونفسيين  
عشنا مراره.. وشيلنا الطين  
كله ف وشك قوي ومتين  
أما لوحدہ يا عيني عليه  
حسره وآهه ونار وأنين  
عداً عليهم ياما سنين  
يضحك لكن جوه حزين  
لما تشوفه.. تلقي كفوفه  
مرسوم فيها العمر أليم  
خط همومه بقى بالكوم  
تسرح فيه مش فارقہ اللوم  
مهما تحاول بقى مش عاتب  
أصل الدنيا دي مش هتدوم  
كلنا عارفين بس سذاجه  
عشنا وقتلنا ملامة ولوم  
عيشه تقصر.. حلم مكسّر  
ميّت يظهر جوه الروح  
تلقى كلامه كله جروح

أيوه وجايز يوم راح نقدر  
ننسى الهمّ نعيش العمر  
بس حاله ماليه الكون  
كله كويس..أيوه يا ريس  
والمركب بالبحر تعوم  
حاجه ألسطه .. وَقَفَّ يا اسطي  
حللنا ميّت في البدروم  
سوق على تكه .. اخدوا الفكه  
وفاضل لنا فلسان محروم  
اه يا ضنايا .. تعبت معايا  
مين قالك تفهم وتقوم  
هي حياتنا .. زي خيبتنا  
زي الغدا بنهار الصوم  
تشحت ممكن .. حق لا يمكن  
بس اوعاك بالظلم تزووم  
خبّي دموعك .. جوّه ضلوعك  
أصل الجرح هموم بالكوم  
...

## ننّ العين

حبيب قلبي وننّ العين  
ده روي بروحك . اتواصلو  
قولي هواك واخذني لفين  
ونحكي الحب من أصله  
أنا عاشقاه بقالي سنين  
عشانه العمر يرخص له  
ولو مالت خطوط قلبي  
بترسم صبح من وصفه  
ولو هاككى جمال قلبه  
بيمحي الدمع يرخص له  
يا زهره ف قلبي بتغني  
بغنة شوق تطمّني  
تقولي انتى اللى فى النّبي  
ساعتها الورد يرقص له  
جميلة الكلمة بحروفك  
وباغزل قمره فى كفوفك  
عيوني كل ما تشوفك  
وريدي يهز ف مفاصله

وباعشق إسمى بلسانك

بيطرح ليلى عشانك

ونجمه يلف وينور

باحبك فوق ماتتصور

.....

## خصام

ومهما يكون خصام بينا

بنظره يدوب

وبانسي المرّ والقسوه

في لحظه بادوب

تعاتب قلبي .. وتصالحه

ولا يهونش عليك جرحه

وأشوف الحب ف عيونك

واكون حزنك ومكنونك

تكون لي حياه

باتوه فيها

وبانسي نفسي انا بيها

ويانسي الآهه والحرمان

واكون جنبك كمان عشان

بلمسه تداوى لجروحي

تكون سري وكمان بوحي

....

## مفرّقين الفرّح

يامفرّقين الفرّح .. قلبي نصيبه فين  
هو اللي قلبه انجرح  
مكتوب له يبقي حزين  
أيامى صبحت ضنا  
ودموعي ع الخدين  
فارقت طعم الهنا .. والدمع مالي العين  
لسه جروحي هنا  
متسطره ف حرفين  
بالهمّ شايفه انا  
وجع الليالي سنين  
ولما ضاع حلمنا .. شق الجراح اتنين  
مين اللي كان جنبنا  
آيه بروح عاشقين  
يا خسارة ضاع مننا  
فجأة في غمضة عين  
مين اللي فينا جنى .. ظلم العذاب والشين  
والله حقي انا  
راجع في يوم الدين

.....

## صعب جدا

صعب جدا

يبقي جواك نار ومرّ

وانت راسم لابتسامه

مخبى أمر

مطلوب منك .. دايمًا تضحك

تفرش قلبك .. مليون مطرح

مطلوب تبقي .. تملئ حنين

حضنك دافئ ... وقلبك طيب

مطلوب تسمع قوى طلباته

تبقي قصاده

تبقي جناين طارحة الورد

تمسح اى دموع ع الخد

مطلوب منك تفضل دايمًا

قايد كل صوابك شمع

تفضل ماسك نفسك خالص

ليه الأمر وليك السمع

ويتفرعن كل أوامره

لما يشوفك وسط الجمع

مش مسموحك تؤمر مرة  
لكن مسموحك بالدمع  
مطلوب حتى ان كنت جريح  
تكتم جرحك .. لأ... وتسامح  
واوعي تلومهة ولا تعاتبهة  
تسكت خالص.. تنسى امبارح  
مطلوب تفضل دوا لجروحه  
حايب نفسه وحايب بوجه  
تمسح دمعہ ان سالت مرة  
تغفر ذنبه وتسعد روجه  
تفرد ايدك زى جناح  
يجرح فيك وتقولہ سماح  
اما ان حالك كان مدبوح  
مش من حقك حتى البوح  
ولا فيه سفينة عشان تركبها  
وانك تغرق... دہ المسموح

.....

## هدية ربنا

لسه يا دوب من كام سنة  
كانت هدية ربنا... ليا انا  
الكحل جنة بين عيونها بيترسم  
والضحكة نجمة منورة  
الفجر صلى وبين جفونها بيتسم  
ده جمالها زهره معطره  
وانا قلبي ناوي فوق كفونها ينقسم  
يرسم قلوب من غير قلم أو مسطره  
إجري في حضني وقربي  
وازاي تخافي وتتعبني  
يا نهار بيعزف سوسنه  
عصفورة بعيون المنى  
والليله نطفي شمعتك  
والأهل فرحه تضمنا  
قمرايا قلبك سكتك  
زي النسيم يطرح غنا  
الورد شقشق ع الندي  
لامس خدودك يلمحك

والبدر ناوى يفرحك  
مين ده اللي يقدر يجرحك  
وانتي اللي عايشه بقلبنا  
الشمس ترسم ضحكك  
يا جميله حتي ف دمعك  
البدر ماشي ف سكتك  
يحميكي من همّ الضنا  
يرقيكي في عيونك يدوب  
ومين يجوب  
الأرض طولها وعرضها  
يمكن يلاقي بحلمها  
أحلام صبايا باسمها  
بالظهر من كل العيوب  
الزهر في رموشك جنى  
أحلام جميلة بمية سنه  
يا ملاك وغايه  
انتي جنه و انتي آيه  
انتي حلم جميل معايا  
بادعي ربي ليكي انتي

كل عام وانتى حبيبتي  
والسنه الجايه ف حضني  
ما انتى دمي وانتى بنتى  
يا عيونى وابتسامتى  
انتى نور قلبى ضحى  
.....



## واضح جدا

م الواضح جدا قدامى  
مابقيتش انا بالنسبة لك شئ  
وغرامى الساكن أحلامي  
بقى يشبه طفل فى بحر غريق  
بتحاول تبعد.....وتحاول  
وانا لسه حبيبة ولسه صديق  
بتسد طريق علشان تبعد  
افتح لك جوه القلب طريق  
مهما ح تبعد ولأ تجرب  
لازم ترجع هنا وتقرب  
جنب حبيبك روح بتصيبك  
اللي يحب بيبقى رفيق  
واما ويريدى النابض ليك  
واللي باحسه الساكن فيك  
مهما تحاول تمحى مشاعرك  
ولا تخبى عليا عينيك  
دقات قلبى العاشقة ضلوعك  
نجم جميل بيطوف حواليك

حاول وابعد ..حاول ح اعند  
مش راح اقولك غير شيء واحد  
انا محتاجة لحضن ايديك  
قلبي سفينة ومهما تباعد  
بالقي الشط ف بحر عينيك  
ما انت امان الدنيا بحالها  
كل سلام الحب ده لنيك  
صحبة ورد يزيد ف جمالها  
لما تشوفك تحلم بيك  
قلبي ضفاير نور رسمالها  
شايفاك بدر بكل ما فيك  
حتى القمره بنورها وطولها  
تتعلق في الروح تناديك  
مهما تفكر تبعد عني  
مش ح اسمح لك مش ح اجاريك  
قلبي ح يفضل عايش بيك  
.....

## مرايتي

وباتداري ورا مرايتي  
واشوف الضحكه ف عيونها  
وقلب الجرح ف حكايتي  
و زيف البسمه من لونها  
ولا قادرة اقول الآه  
ولا عايشة انا بدونها  
خلاص صبحت فى تكوينى  
وانا اللى صبحت تكوينها  
وبين الدمعه والضحكه  
انا الضلمه اللى باسكنها  
اعدي السكّه ومداها  
غريبه ف الحياه بطولها  
ما انا الاتنين  
وعندي روحين.. لكن عايشين  
وخايفين ف الحياه من بعض  
انا ضدين  
جراح مخفيه تدّارى  
ورا وشّ الخداع مرتاح

تاخذني التوهه لمتاهه  
اكون ف الأصل ك التفاح  
ولا مرة قدرت اكون  
ولا مرة تفارقتي جراح  
يا صبر الصبر امتي يهون  
فصام الروح علي الأفراح  
ويتحدد معاها اللون  
عشان قلب الوجع يرتاح  
مانيش عارفه  
أكون الأصل ونقيضه  
وليه ف الوش تنهيده  
جراح جوايا بتزيده  
تخليني اعيش بجروح  
واروح مطرح م عيني تروح  
اكون ف مرايتي ضحكايه  
وضهري م الألم مدبوح

.....



## غزالة الورد

ياغزالة الورد من لونك  
ياطارحة الحب فى عيونك  
أنا الزهرة فى توب كونك  
أنا حضنك ونبراسك  
أنا أرضك وحراسك  
أنا ناسك منين ما بروح  
أوضي الحرف من روى  
آذان بينادى إحساسى  
ياظلة من صلاة الفجر  
دعا يشفى جراح الغدر  
شهيد حالف يوفى الندر  
يشوف الجنة اقداسك  
يا راسمة فى السما ألوان  
بتطبع جوه قلبى أمان  
يا عمرة طهر فى مناسك  
خضارك لسه جوه الروح  
بلون بنوته مصرية  
براح الدلتا وين ما تروح

يقابلك حب .. حنية  
وقمرك في السما بيبوح  
في نن عنكي يا بهية  
وليد راسم عيونك ضي  
شهاد لكن بحُبك حي  
يكلم فجر بكرة الجاي  
بيطبع دايمًا الفرحة  
عشان كل الغصون طارحة  
بترسم م الحنين حنة  
وتطرح ورد م الجنة  
و هزّي في النخيل يا امه  
هناك جوه الغيطان عصفور  
بيزرع لنا م الطيبة  
ويشرق من عبرها النور  
ويحيي روحنا من تاني  
بسورة جميلة عجباني  
وم الحصرى بنتعلم  
وصوته بيشجى وجداني  
.....

## أم الشهيد

واتحجرت كل القلوب  
وخلص يادوب  
بافرش ورود السكة لجلِ خطوتك  
تطل بيها فرحتك  
و القى هناك لمة وخطر  
قالوا الولد دمه اتهدر  
فرحة حياتي  
واللى باقى م الزمن  
قلبي انخطف  
جمره جوه ضلوعى خايف  
م الخطاوى  
راح اشوف الدم سايل  
فوق جبين ورد اتقطف  
قالوا مااااااات  
مش باقى منك يا ضنايا  
إلا حبة ذكريات  
ماتت الفرحة معاك .. والدمع نار  
يملى السواقى بالجفا

ربي اصطفى روحك ودمك  
تفدى بلدك والعلم  
قول يا قلم .. على جرح ام  
بتتوجع لحظة نداك  
فضلت انادى ما لاقيه رد  
دبلت ورود بدموع الخد  
خذت أحلى سنين ف عمرى  
سيبتنى وبعدت ياابنى  
طريق رجوعك للحبايب  
اخره سد ...ياحزن هد  
كنت لي في العتمة نور  
لكن خلاص دمع البكا ملو البحور  
يا رب ولدي في التراب  
بين القبور اقبل دعايا  
يبقي بيته وسط حور  
عفوك وجودك  
للشهاد دايم غفور  
.....

## مش باصدق

لو قالولى حاجة عنك  
مش باصدق أى كلمة  
قلبى يحترار وياً عقلى  
والجنون بياخذنى منك  
ويخاصمنى اكمن عقلى  
صدق الكلام وفكر  
إنك انت فيك واكثر  
م الحاجات الوحشة ديه  
دول يقولوا ودول يعيدوا  
ان قلبك زى مبنى  
فيه من الأشكال كتير  
أى واحدة تعدى جنبك  
تتوهم وتقول أمير  
وان عقلك لو يفكر  
يوم فى واحدة  
تبقى عملت مستحيل  
وان .. وان ... كلام كتير

والخداع ده هو طبعك  
والكلام الحلو منك  
لو تقوله شي خطير  
ده يفسر شي يحسر  
ان قلبك شي مكسر  
صعب يسكن او يغير  
صعب جدا يوم اصدق  
مهما يحصل مستحيل  
قلبي على الكلام ده يقدر  
بس عقلى ساعات يغير  
اعمل ايه معاه قولولى  
اصله حبه شي دفين  
جوه روجي من سنين  
لو بايدي كنت اغيب  
وانسي انه كان حبيب  
بس روجي جوه مني  
تعشقه وده غصب عني  
بس خايفه من سكاته  
كل شيء لغز ف حياته

يلي قلبك طيفه صيف  
يتحرق جواه ربيع  
قلبي جنة نبضه طيف  
أعشقتك توعدي بكرة  
ابقي روحك أحلي فكرة  
واصحي القى نفسي نكري  
يعني كنت عايشه زهرة  
بس ماتت في الخريف  
.....

## انا انسان

لا انا شاعر.. ولا فنان  
ولا عن قافيه هتكلم .. ولا أوزان  
أنا إنسان

باحس الكلمة والمعنى  
وباعمل للحياة معنى  
في أى مكان

باداوى جروحي جوايا  
وبالإمكان أكون جارح  
كثير نفسى ويرضو كمان  
بابصّ لروحي من جوه  
بالاقي الآمه محفورة  
وبالكتمان

بتطلع منى كام صورة  
مابين الذكري محصورة  
وبالحسبان

ولا عن حالى باتكلم  
ولا الأزمان  
أنا إنسان

باعيش الدنيا وبعانى  
من الحرمان  
ما بين قلبى ودقاته  
باتوه يازمان  
لا مرة حقيقى  
حسيتها ف يوم بأمان  
ولا عقلى ف لحظة ارتاح  
ولا مره هاعيش بسماح  
واهى دنيا ومحسوبة  
تعيشها ف ثانية مقلوبة  
لكن مغصوب تعيش فيها  
.....

## حبيتي ليه

حبيتي ليه

لما انت ناوى ع البعاد

وجرحت قلب وكنت ليه

كل اللي فات

قلب حبك وبعنون

كنت ليله والسكون

كان بيهمس لك بحاله

كنت اكثر قلب صانه

كنت بالنسبة له ضلة

لما شمس نهار تغيب

زى شجرة واقفة ثابتة

مستحيل ابدأ تميل

كنت توعد وقت ضيقه

الفراق صعب و بعيد

نبضه عايش في الوريد

سيبته ليه ويعيش شريد

لما كانت نظرة منه

تمسح الدمع اللي ساكن

بين جفون عاشت تملئ  
تحضن الفجر اللي قادر  
نسمة منه تعيد لقلبي  
لحظة م العمر اللي غادر

.....

## حلم بكرة

كلنا بنحلم ببكرة  
جايب الأفراح معاه  
حللنا يبدأ بخطوة  
والمنى يسبق نداءه  
احلمى يا عين ببكرة  
دوبى الأحزان بفكرة  
اندهى للفرح يوم  
حاولى تمحى لي الهموم  
اغزلى عنقود محبة  
اجمعى شوق الأحبة  
اطرحى وردك معاه  
بيتى الحب اللى ساكن  
فى الجوارح والأماكن  
اطفى نار البعد لكن  
سيبى ذكرى للحياة  
قلبى عايش ع المحبة  
ليل نهاره طوق نجاة  
يدعى ربه للأحبه

كل طير ياخذ مناه  
يدعى لكن جوه منه  
صوت حزين  
والناى معاه  
يوصف الصبح اللى فجره  
كل دعوة لمنتهاه  
.....

## لسّة فاكرة

لسّة فاكرة...

كل حاجة ف قلبى لىك

لسّة باتشوق لنظرة من عنىك

لسّة جوايا البراءة

لسّة باحلم وىجراة

أىوه عاوزاك لىا وحدى

أىوه باحلم اكون معاك

لسّة شايقة الحلم وردى

لسّة باتمنى لرضاك

لسّة جوه منى لىك

كل أحلامنا البريئة

زى فرع ف شجرة طارحة

ورده عايشة جوه حلم

زى قمره ف لىل سكون

نجم شارد وىجنون

حب كل حىاته منك

كان بىحلم بىبقى جنبك

.....

## يا صابرة

ف وسط التوهه والزحمة  
و ناس تايهه.. ومفيش رحمة  
في سكة الظلم ماليها  
وطعم المر كاسيها  
وناس البعد خلاهم  
قلوب جافية ما يكفيها  
دموع ساكنة ف نن العين  
و مين علي الغدر يتأسف  
يكمل خط شرياني  
بقلب وريدى ويعانى  
علي دنيا بعرض الخوف  
وليل يبكي بمدد الشوف  
يا صابره والجراح ملفوف  
علي روحك من الجاني  
ده مين عرفك باحزانك  
غير اللي أساسه سجانك  
وعارفه الكل ليه خاكن  
لإنك فى زمانك طهر

يا شهد ولو أوانك مر  
نجومك زي ضيك ضر  
لكن م العتمة شريانك  
وقلبك زي بركانك  
ولا عارفة لشطك بر  
يادنيا فين طريق الصبر  
عشان ادفع بدمى المهر  
لحم يتيمة مسلوية  
فى أحلامها ومنهوبة  
فتضحك ضحكة مقلوبة  
وبسمة زيف بتولد قهر  
ياخوفى ياعينى لتشوفى  
بيوت الضلمة فى حروفى  
والاقى صلاتى من خوفى  
دعاء باطل فى ليلة القدر  
.....

## وبيقول لي

أنا العاشق عنيكى السود  
أنا السارح وفي الملكوت  
بانادى كل شي فيكى  
معاكى بادوب ف معانيكى  
وبانسى الآهه والتوهه  
وباحلم بس اكون ليكى  
يقولى كتير كلام ويعيد  
واعيش احلم بكل جديد  
مع حبه ..مع قلبه اللي بيعاني  
مع الدنيا اللي ناسياني  
وفاكراني باني وحيد  
ساعات احلم  
وجوه الحلم باتعشم  
بانه حقيقة قدامى  
كان يقول يا بنت قلبى  
وكنت طفلة مصدقاه  
كان يقولى ١٠٠ بحبك  
بس قلبى مش معاه

كان بيرجع لما يتعب  
واما يلقي الدنيا فاضية  
كان بيتعب من نداه  
كنت جاهلة بجد جدا  
لما اصدق كدبه ليا  
كنت عايشة بروحه جنبي  
والسعادة بين ايديا  
يحتويني بكل نظرة  
وانسى مرّ الدنيا ديه  
كنت فاكرة ان حبه  
كان هيمحي لي الأسيه

.....

## مصر روجي

مصر روجى .. صوتى.. بوجى

ول جروجى ألف سد

مصر نهر لأى حد

مصر غالية

والملايكة بيحرسوها

م الهموم ولا المقاسي

حبها مالى الضلوع

صوت حنينها جوه قلبى

زهر طارح لون غنايا

غنوة حلوة للصبايا

ياللى حضنك نور وآيه

حب ماله يوم نهاية

اسألوا، عنها السواقي

والنخيل حتي الشراقي

حلم عمري وانتماي

اسألوا عنها الجنود

راية واقفة ع الحدود

ارمي حملك فوق كتافي

اوعي وانا موجود تخافي

روحي دمي نبع صافي

والتاريخ والنيل شهود

انا منك .. وانت مني

وانت عشقاني كإناك

روح ملاك بالطهر منك

دعوة طالعه في السجود

.....

## لَسَّاكَ

لَسَّاكَ جَرِيح...  
والليل بيحضن خطوتك  
لَسَّه السَّوَال ....  
مالك سنينك سكتك  
لَسَّه الخطاوى مفرقة  
بين الحوارى والبيوت  
سنين باعاند ليه بقي  
والحنين راضي السكوت  
لَسَّه العيون مدمة فوق الخدود  
لَسَّه الرصيف حاضن  
خريف الحب من بين السدود  
لَسَّه الثوانى والدقايق  
سابقة روحها للوجود  
لَسَّه قلبي كان بيحلم  
انه عايش بين حدود  
لَسَّه عايشة الكلمة بنا  
تبني لنا م البيوت  
.....

## بعد مني

بعد مني

راح تلاقى الكون عجيب

مش غرور

أصل حبي شي غريب

يملك الإحساس في ثانية

تلقى روحك حاجة ثانية

تنسى نفسك تبقى مين

طبطبة إيدى اللي كانت

من حنانها تتوه ف ثانية

ولاً نظرة من عينيا

تمحى أى مرار ف دنيا

ظلمها زايد زيادة

الأمان من طبعى عادة

بين رموشي بتنسى همك

قلبي بالحنان يضمك

بعد مني

طفل شارد ف الغروب

طفل تايه من امانه

مستحيل ابدأ يجوب  
بعد منى .. الدنيا ضلّمة  
حزن محفور ف القلوب  
صعب تنسى  
انى اصلي الابتسامة  
وانها فوق الشفايف  
كات بترسم لك علامة  
صعب تمحي  
جوه منك ذكرى ليا  
صعب جدا .. مش بإيدك  
تنسى اي حاجة فيا  
.....

## مرهقة

انا مرهقة.. وجوه منى  
حاجات كثير متلخبطة  
حابة الحياة حبة ساعات  
وكارهه نفسى من سكات  
الليل ودمعه... والآهات متفرقة  
فوق الخدود حبة سكوت  
راسمين طريق .. صابه الجمود  
ودموع بتنزف م الرحيل  
وبين رموش.. وننّ عين أصبح حزين  
حتى القلم .. حبره اتكتم  
وكل شي .. خيره اتعدم  
وساعات كثير .. باسأل سنين عدت هنا  
خذت الحبايب مننا .. سابت قلوب  
مكسورة شوق .. على اللي غاب  
واللى حضنه... كوم التراب  
مش فارقة دمعى لو يرجع  
لحظة م العمر اللي غاب

.....

## صباح الخير

صباح الورد ع الشقيان  
على رزقه بيجري كمان  
يصحي الصبح ويصلي  
ويدعي يارب يوصلني  
حلال الرزق بالإيمان  
ويفتح للخروج بابه  
ويظمن على احبابه  
ولاده وأهله في غيابه  
امانه ف رحمة الرحمن  
ده رغم الضيقه و التهميش  
اصيل عايش كما الدروايش  
ويحمد لو .. ف جيبه مفيش  
ولا هده ف مرة زمان  
وواخذ للحياة عنوان  
بكل الطيبة ماليه الوش  
وقلبيه جميل مايعرف غش  
بينسى القسوة والآهه  
عايش طول عمره في متاهه

لكن بالضحكة واصل له  
براحة البال يكون راضى  
ومش عايش على الفاضى  
بيتفائل بكل الخير  
بكل الحب يدِّي الغير  
.....

## فرحانة السما

لَسَّهَ السَّما فَرحانة  
بِيك و بِخَطوتك  
لَسَّهَ الحَمام ف الغار  
بِيحكي قِصَّتْكَ  
لَسَّهَ القلوب المؤمنة  
طالِبُه النِجاء  
نَفس الملائِكة بِترسمك  
صُنِعَ الإِله  
يا أحن من كل البشر  
يا بن عبد اللاه  
يانور وطارح للسما  
نَفسِي في رضاه  
كل الملائِكة تحرسك  
وقت الصلاه  
انت الحبيب المصطفى  
طابت يداه  
يا طه جل اللي اصطفى  
ربي ف علاه

في البرد اسمك ده الدفا  
هو الحياه  
واعلن واقولها في الخفا  
روحي فداه  
نفسى اشوفك في المنام  
تهديني من روحك صفا  
و اصلي طول الليل قيام  
و اتوضا منك معرفه  
واتحامي في ايديك السلام  
لو حتى كل الكون جفا  
يا مصطفى  
نفسى ابكي بين ايديك  
دمعتي تكمل خشوعي  
ربنا يصلي عليك  
والجنة تتوضا ف دموعي  
والتقيك طوق النجاه  
ع الصراط تبقي الإمام  
والرسل إيدها تسلم  
و العدرا تبعت لك سلام

يا عزم من كل البشر  
حمامة بيضا ع القمر  
تدعي لربك فى السحر  
وتردني لو قلبى تاه  
يا طه روى بتناديك  
بابويا وامى افتديك  
بالله عليك اتحامى فيك  
ساعة رجوعنا للاله  
يا اله الكون نبينا  
هو آخر حلم لينا  
هو قال إن احنا لينا  
توبه للرب ف علاه  
.....

## أيوه انتي

سر عمرى وابتسامتي  
من حنان الضمه كنتي  
حته مني ومن شقاوتي  
كل زهره من حلاوتك  
ياللي عشقاني بغلاوتك  
قولى مين ف الدنيا ديه  
يعشقتك غير حضن مامتك  
كل شي في العمر هيه  
ضحكتك وكمان شقاوتك  
ولا اقولك يا حبيبتي  
قلب ماما وروحي انتي  
يوم ميلادك ورد يسأل  
عن سعاد الحلوه بنتي  
نفسي اشوفك وقت ما اكبر  
بحر خير شايل سفينتي  
ف الأدان .. الله اكبر  
ادعي ليكي يا اميرتي  
كلمه منك نور منور

ضيّ سارح فوق مدينتي  
نفسى أعرف ليه لوحدك  
مالكه روجي جوه قلبك  
ده النهار زي ابتسامتك  
يحضنك ويقول حبيبتى  
يا جميل الشهد حلى  
الكفوف سكر تملى  
فى عيونها قام يصلى  
اصل سوسو نور حكايتى  
جوه منى كنتى نفسى  
قبل منى كنتى نفسى  
ما انت قمرى جنب شمسي  
من بدايتى ولنهايتى  
ادعى ربي انه يصونك  
والملايكه تدور ف كونك  
افرحى وعيشى بجنونك  
واحضنيني يا اميرتى  
.....

## ورحاله

في دمة ليل وترحاله  
بنفس الحزن والحاله  
الملم م الوجع ألوان  
و اجمّع كل يوم فكرة  
واعشّم نفسي من بكرة  
اكون عايش أكون إنسان  
الاقبي الدمع ليه يقرا  
وبكرة يفوت مالوهش وجود  
امل ماشى طريق مسدود  
ومين هيعود  
يحاجي الدمعه فوق خدي  
يقولى ده ساعة وتعدي  
يا صبر الصبر من كدي  
واملي في ربنا المعبود  
انا تايهه ما بين ناسي  
وتايهه دمعتي بكاسي  
وليه مقطوعه انفاسي؟؟  
وانا روحي نغم و ورود

وتبكي القمره من وجعي  
وقلب الصخره من دمعي  
ودمعه صهد من شمعي  
تغيب ثانيه وثانيه تعود  
قولولي يا اعز ما ليا  
يا اهلي وناسي وعينيا  
ماشوفتش منكو حنية  
ولا كلمة طيابة تجود  
لا انا شايفه طريق ضحكة  
ولا فيها لقيت سكة  
جراحي صوتها على تكة  
كإني ف الجراح مولود  
.....

## ترتیبی

هاعید من تانی ترتیبی  
هلملم جرح تعذیبی  
هاکون أقوى من الايام  
وتطرح فرحتی أحلام  
ماانا لسه هنا عایشة  
هاداری الدمع فی ضلوعي  
واخلي نصیبی من طوعي  
هاخلي الشمس ف سطوعي  
نهار یضحك بروح طیبی  
وراضیة بكل شیء جايز  
وايه غیر الرضا بإیدی  
هاكسر حزنی لو عایز  
یطفئ حلمی وکیانی  
ح اعود نفسی من صبري  
اهدده ف الوجع جرحي  
ها اخلي التوهه من فرحي  
تقولی الدنيا مش دائمة  
ولا واقفة علشانی

ولو بصيت على حلمي  
هالاقى حلمى متكسّر  
ومتكسّر  
ولو حنيت لماضى لعين  
انا بأخسر  
هاوفى الدين  
واكون م القسوة جبروتها  
بتتحول بميت صورة  
دى مكروهه الحياة والناس  
ومهما هتوصف الإحساس  
قوام تنداس  
وتلقى الجرح اقرب ناس  
عشان غيرك يكون مبسوط  
لايد تموت  
وتنده حس ف الملكوت انا منكم  
وعشت الصعب علشانكم  
ولا شوفت ف عيونكم خير  
ولا كنت الحبيب بينكم  
ولا فارقه أعيش العمر من غيركم

كفايه الجرح يرسمكم صدى كداب  
وكثر عذاب وقلب سراب  
وهاتو للفرق أسباب  
انا هافضل هنا جنبي  
اخط السطر جوه كتاب  
سلام يا جرح من قلبي  
هاعيش للعمر لو شبهي  
ولو قالوا ف بعدي عذاب  
ده جرح نفوسكو مش ذنبي  
عشان تنتقموا من قلبي  
يا طعم الغدر يا مخبي.. أمل كداب  
يا دوب امشي على جرحي  
واعذب في الهوى فرحي  
يا خوفي يا عيني لتسامحي  
قلوب ماتت بلا أسباب  
يا بحر البعد عديني  
على شطي و رسيني  
خلاص يا فرحه سامحيني  
وداع يا قلب كله عذاب

## خدني لعينيك

خدني لعينيك  
مشتاقه ليك  
محتاجه قلبك.. ضمني  
يا حب ليه بيشدني  
ضي القمر ما بين عينيك  
انا حرف دايب يعشقتك  
ف كل لحظه باصدقك  
ان الحنان من حبه فيك  
يجرى في وريدك يخطفك  
جنة وزهورها بتعرفك  
يا غالي لو مين ينصفك  
ماقدرش يوصف حبي ليك  
يا عيون تغني للفضا  
على قلبه أوراق الندي  
تتهجأ أحلام الهوى  
تنده تقول الله عليك  
يا عيون خدتنى للسما  
طايره بخيالي إنما

نفسى اعيش الملحمة  
جواك وبيك  
ولا عمر جرح يهدني  
ما انت اللي حبك هزني  
محتاجه حضنك .. ضمني  
ما انا روجي فيك  
.....

## عند المقام

مرمغ جبينك ف التراب  
اطلب من الحرف العذاب  
اكتب تاريخك كله هم  
ارمي نذورك وعد دم  
إن اللي باقي من زمانك  
مش عشائك  
اللي فاضل متر ميت  
ده مكانك  
اشترى عمرك بموتك  
يعتذر عنك سكوتك  
لو في يوم طلّعت صوتك  
تبقي عايش في السراب  
الزفه جايه بالصبايا الفللي  
حضره و كرامة للولي  
ياللي انتي خايفه تسألني  
ما تجاوبي قولي تبقي مين؟؟  
في الحضرة طالعه بموكبك  
وشيوخ طريقه

بالتوهه مولد يشبهك  
هي الحقيقة  
وحدها ليه تقتلك  
رغم اني مادم  
بالكفوف طالب مزار  
في مقام دموعك  
ألف دُف.. وألف زار  
ياللي انت ساقيانى المرار  
وكرامه جارحه نسألك  
مين زعلك  
من مريد طمعان ثوابك  
يفتح القسوة ف كتابك  
وجراح بتتحنى بعذابك  
يبقى وقت الزفّه نار  
يطلبك ويقول مدد  
مكروه بطهرك يا ولد  
عند المقام ارجع قوام  
عن ندر مهموم بالوتد  
كل اما ييجي لحضرتك

بيلاقي في ترابك سدد  
حتي الحمام من قسوتك  
يتمني موته في العدد  
ازاي اكون طالب لجوء  
لعيون شايفها نور وضوء  
وحمام مقامك راح لفوق  
مين رجعه لبوق الاسد

.....

## كثير بيتدارى

كثير م الناس بيتدارى  
ورا وشوشهم ألم وخذاع  
ورا ستارة ...

بتخدع بس بجدارة  
وماسك بيتخلع دايمًا  
فى وقت الجد بمهارة  
أنا معاهم نسيت نفسى  
نسيت بكرة .. نسيت أمسى  
نسيت انى بوش الحق  
وهما وشوشهم القشرة  
بتظهر بس بشطارة  
حقيقى بجد محتارة  
وانا اسفة ومنهارة  
لنفسى اللى كثير ضحت  
لناس قاسية وخذارة  
سمحت لنفسى بالفرقة  
ومركب قلبى فى الغرقة  
كثير سالت ٢٠٠ دمة

ف روعي الحزن يتوضا  
علي الطيبه لنفوس مرضى  
باقوم مفزوعه م الخضه  
واطفي ف ضحكتي شمعه  
على الناس اللي حبيتهم  
بسرعة الدنيا ساعدتهم  
ده نسيوني وما نسيتهم  
وأيام حلوه .. مش راجعه  
عشانهم بابكي من دمي  
ويدبح فيا ما يسمي  
قلوب كانت شبه امي  
ودمعه بتحضن الدمعه  
وداع يا حب م الاخر  
كفايه في قلبي بتعافر  
يا حضن الحب يا مسافر  
جراحي ف الوداع سامعه  
.....

## دموعي سابقاني

انا اللى دموعى سابقانى

وليه الدنيا سارقانى

ومن نفسى تملئ باتوه

أنا اللى الوحده صاحبتنى

وليه الدنيا عاندتنى

تمرجح فيا أحلامى

ساعات الفرح بتعدى

ولا تهدي

ساعات الحزن بيعشش

بيسكن جوه شراينى

ويقتل كل أحلامى

ويولد خوف

يدمر كل أفكارى

.....

## هلال رمضان

إيه السر ياماما قوليلي  
لما يهّل هلال رمضان  
يفرح قلبي وتضحك عيني  
زينة وزينة ف كل مكان  
وفانوس نوره يهّل هلال  
شمعة وقايدة بكل جمال  
لمّة جميلة ويّا فطار  
وصواني لحمه بقلب خضار  
احكى ياماما ويالاً قوليلي  
ليه الفرحة ف كل مكان  
لما يهّل هلال رمضان  
علشان رحمة ونور وايمان  
دعوة بتطرح كل ادان  
رمضان لمّة وصحبة جنان  
تيتة وجدو قالوها زمان  
رمضان زينة وفرحة عيلة  
فجر ومغرب دعوة جميلة  
والأولاد . بتقول يا حليله

زي فانوسهم فرحه تشوفهم  
نجمه تنور كل مكان  
ادعى ياماما وقولى كمان  
دعوة وصادقة ف ليل رمضان  
واما يهلاً هلال العيد  
يفرح قلبي بكل جديد  
تملا جيوبى عيديه كبيرة  
كل خيلاني ويا أعمامي  
وكله يمد ييوس ايد جدو  
يرجع بابا بعد أدان  
هيفسحنى ف كل مكان  
بس ياقلبي لازم تفتكرى  
تدى الصدقة وتدى الخير  
يطرح قلبك كل جميل  
يحلى صيامك بالقران  
وتصلى مع كل ادان  
ينزل ورد يغطى عنيكى  
صف ملايكة بتهنيكى  
يكتبوا اسمك م الذاكرين

## قاضي وجلاد

بقيت قاضي وكمان جلاد  
عشان اشتقت لعيونك  
ولو اجيلك .. و الف بلاد  
واكون سرك ومكنونك  
واكون الضي في عيونك  
عشان يفضل ما بينا ميعاد  
يا نبض القلب ايه فيينك  
انا عاشقه عيونك زاد  
ده شمس الحب من شالك  
تحني البدر لو جالك  
علي رمشك  
عيوني وروحي جياالك  
تقول اسمك .. ما انا رسمك  
في وقت الصعب تلقاني  
هدير البحر في حناني  
يا غالي العشق لو جاني .. بيترجي  
اكون النبض من حرفه مراسيلك  
ويرغمني بكلمة حب احكيك

واغنيك حكاية عشق بنوته  
ضفاير جوه حدوته  
بأغنيه على نوتة .. موسيقي القلب  
ده حبك حتي لو كان ذنب  
هاموت في عينيه  
وعلمني اعيش اداريه  
ولا يكفيه  
كلام الدنيا حب في حب  
يا ساكن جوه جوه القلب  
انا في خيالك أتوضا  
واشوف العشق شرق وغرب  
يا نبض وريده من فضه  
عشانك عمرى طفل يحب  
.....

## قولوا له

قولوله مت من بعده  
وناره القايدة تكوينى  
خلاص قلبى انا فى بعده  
بطعم المر يسقينى  
قولوله البعد على عينى  
لكن نبضه بشرائنى  
قولوله ازاي انا دايبه  
ومين غيره بيحبنى  
يانظرة بالهوى شاردة  
تدوب فى النار وترمينى  
قولوله بجد انا خايفة  
بقلبى وكل تكوينى  
وزهرة حبنا شاهدة  
ومشاقة له يشفينى  
من الجرح اللئى مايرضى  
ببعد حبيبي عن عينى  
سفينة حبنا غايبه  
وشط الحب جافينى

وليه تبعد وانا عشقاك  
وكيف تعند وانا شاريك  
وانا اللي وهبت لك حالى  
وشطى فى الهوى عالى  
ووقت الحلم فى خيالى  
بيندهلك ده روحى فداك  
ياظير الحب يامسافر  
سلامى لحب بيعافر  
وبيضم الحنان ب آنين  
ياغربة حبيبي رايح فين  
وفين ياسكة العاشقين  
تلاقى الفرحة فى الآخر  
قولوله وحشنى فى زمانى  
ياحب الحب ياحنانى  
ياعمر يداوى احزانى  
عشانتك باقية وبعافر  
على ضىّ الشموس بمشى  
واغنيك على رمشى  
ويشكى لك هوا كافر

فلا تسافر وتنساني  
تعالى لروحي وكيانى  
نعيد الحلم من تانى  
ونرسم قلبنا المولود  
على كفوفك وشريانى  
نرجع فرحنا المفقود  
يهد فى دمة بتعانى  
نكمل عشقنا الموعود  
وضى عيونه وحشانى  
ونكتب عقدنا بشهود  
احبك وانت تهوانى

.....

## خيط مقطوع

أنا خيط مقطوع .. من كتر الشد  
أنا فجر بيطرح أسوأ غد  
أنا دمعة غريقه في قلب المد  
أنا شجرة عمري وشرياني  
وردايه وشوكها بيجرح خد  
أنا بحر التوهه ف احزان  
بيلملم جرحه ويبكى بجد  
أنا بنيان عالي مالوهش مكان  
أنا مين ولفين .. رايح يا زمان  
قلبين عايشين قصة احزان  
لو برسم بسمة .تموت ف الهد  
أنا موجه وعايشه .. ما بين شطين  
أنا نظرة بتوجع جوه العين  
أنا بين الاتنين مش عارفه لفين  
بياخذني الجرح حكاية عند  
ليه وسط القلب تملي دموع  
بيسئلم وجعي يد بيد  
من كل الفرح طريق ممنوع

ألقاه السم ف كاس الشهد  
وفي عز الضلمه يطفى شموع  
ويموت مخنوق والجرح يهد

.....

## الحنن معشش ١٧

الحنن معشش نن العين

وما بين رمشين واقفة دموعى

لا انا عارفة لإمتى.. إزاي.. ولفين..

محفورة أهات... ساكنة ضلوعى!؟

باضحك والضحكة تبان صافية

بتعدي ايام كده بالعافية

مش فارق بكرة عن امبارح

أيام بنعيشها وبنسامح

وياريتها تعدى ونتصالح

فين راحت أحضانها الدافية

.....

## الشاعرة في سطور

الاسم : هبة حسن حسين

المؤهل : دبلوم حاسب ألي

عضو رابطة الزجالين وكتاب الأغاني

عضو نادي أدب القلج بالقلبيوية

لي مدونه اليكترونيه باسم / همس الحروف

أكثر من شهادة تقدير من مجلة همس مصر للشعر والأدب

شهادة تقدير من حزب مصر القومي

شهادة تقدير من منتدى الأجابة الأدبي

شهادة تقدير من حزب الحرية بالاسكندرية

شهادة تقدير وميدالية من مجلة أنامل الشعراء وحصولي على

المركز الثالث في مسابقة المجلة السنوية

الاشترك في ديوان مجمع لمجلة همس مصر للشعر والادب

صدر لها ديوان / أتحداك ( شعر عامية ) ٢٠١٧

## الفهرس

م	القصيدة	الصفحة	م	القصيدة	الصفحة
١	بطاقة الكتاب	٢	٢٧	مش باصدق	٥٠
٢	إهداء	٣	٢٨	أنا إنسان	٥٢
٣	كل نذبي	٤	٢٩	حبيبي لي	٥٥
٤	نقش الدمعة	٦	٣٠	حلم بكرة	٥٧
٥	أمي الغالية	٨	٣١	لسة فاكر	٥٩
٦	إلى روعي	١٠	٣٢	ياصابرة	٦٠
٧	خيط العنكبوت	١١	٣٣	وبيقول لي	٦٢
٨	اعذروني	١٤	٣٤	مصر روعي	٦٤
٩	حالة حزن	١٥	٣٥	لساك	٦٦
١٠	وجالك قلب	١٧	٣٦	بعد مني	٦٧
١١	على عيني	٢٠	٣٧	مرهقة	٦٩
١٢	مين فينا	٢١	٣٨	صباح الخير	٧٠
١٣	جرب	٢٣	٣٩	فرحانة السما	٧٢
١٤	ومين بعدك	٢٤	٤٠	أيوة انتي	٧٥
١٥	آه م الرجالة	٢٦	٤١	ورحالة	٧٧
١٦	إختلاف الأمنيات	٢٨	٤٢	ترتيبي	٧٩
١٧	كلنا مرضى	٣٠	٤٣	خدني لعنيك	٨٢
١٨	نن العين	٣٢	٤٤	عند المقام	٨٤
١٩	خصام	٣٤	٤٥	كتير بيتدارى	٨٧
٢٠	مفرقين الفرح	٣٥	٤٦	دموعي سابقاني	٨٩
٢١	صعب جدا	٣٧	٤٧	هلال رمضان	٩٠
٢٢	هدية ربنا	٣٩	٤٨	قاضي وجلاد	٩٢
٢٣	واضح جدا	٤٢	٤٩	قولوا له	٩٤
٢٤	مرايتي	٤٤	٥٠	خيط مقطوع	٩٧
٢٥	غازلة الورد	٤٦	٥١	التعريف بالشاعرة	٩٩
٢٦	أم الشهيد	٤٨	٥٢	الفهرس	١٠٠